



2007

---

Dangg fääderwaiche Schiine duss  
isch d` Musig dinne ändlig e Gnuss  
nur mien mir uns jetzt hindersinne  
was schützt uns duss vom Lärme dinne

Dr Hamatschu gniesst s` Räntnerlääbe  
dr Zubi gryfft wyt fuurt dernäabe  
hört dr Bush no uff, mir hätte s` Gschängg  
wär blybt is no fir d` Schnitzelbängg

D` Schugger fiere Diskussione  
wääg de neie Maa- Stopp Schiessbatroone  
ych bruuch so Dinger, dehai bi mim Maa  
dass wenn äär z` gschwind kunnt, ych in stoppe kaa

Uff dr suechi nach Wärmi, händ` s in Baasel grüüblet  
denn hett` s gschittlet, d` Lyt hän` s verüüblet  
mir hän e Ydee, doo gääb` s kai Beebe  
dyend aifach mit em Minu Händli heebe

Vom Costanzo schwärme alli Fraue  
nur d` Mannschaft ka im nit Vertraue  
bivoor är sich zer Balle streggt  
wird zeerscht no gschwind d` Frisur abtscheggt

Dr Schumi styygt jetz uss em Kaare  
hett gnueg vom raase und im graisli fahre  
wär das jetz scheen, s` wurd kaine steere  
wurd nääbscht däm Raaser au dr Blocher heere

Mir mache Wäärbig, sensationell  
fir es Produkt, s` heisst Actimel  
d` Abwehrgräft wäärde gsteerggt, verspricht dr Kachelmaa  
drum dängge mir, das Gsöff sot au dr FCB haa

Luts Gschrei und Lärm im Kinderzimmer  
„Jetzt händlet , zigglet doch nit immer“  
doo sait my Soon, wo pfätzt und schloot  
„ Mir spiile doch nur Bundesroot“

All Joor, an dr Tour de France  
hän nur die wiirgglig staargge e Chance  
drum liis i dr Raadsport- Bricht so gäärn  
und am Donnschtig dr Drogischtestäärn

Das gfallt mym Schatz, ha ych mir dänggt  
und im firs Tattoo e Byyljee gschänggt  
im näggschte Summer griegt den Ihre Schatz  
fir s Byyljee au sogar e Blatz